

Nihánj me síj vij yanj cartá qui'yaj síi cu'naj Pabló ca'néé so' rihaan síi cu'naj Timoteo a

¹ 'Uñj nihánj me síi cu'naj Pabló, ne cune' Jesucristó mán 'uñj guún 'uñj apóstol nata' rihaan yuvij se vaa gaa i'na' ní' nu' cavii nu' ca'anj qui'yaj Jesucristó, ne yo' me suun me rá Diose qui'yaj sunj adonj.

² 'Yáa 'uñj yanj nihánj ca'nej 'uñj rihaan so' sij cu'naj Timoteo a. 'Ee rá 'uñj mán so', tinuj. Ase vaa 'o ta'níi 'uñj, danj vaa so' rihanj á. Me rá 'uñj qui'yaj ndo'o Diose Rej ní' do', Jesucristó sij 'nij ra'a man ní' do', se luj che'é so', ne me rá 'uñj gaa 'ee rá roj so' mán so', ne gaa xej nimán so', qui'yaj roj so' a.

Nana nihánj taj xna'anj se vaa guun niha' doj rá ní' qui'yaj suun ní' rihaan Diose a

³ Dan me se 'uñj nihánj me síi 'yaj suun rihaan Diose ndaa vaa qui'yaj nij xií 'uñj gaa naá, ne nuvi' cacun' tumej mei. Ne dan me se tananj nagó' 'uñj graciá rihaan Diose che'é so', ne yo'o nuú raj mán so', ne 'o achín ni'yáj che'é so' rihaan Diose nuvii nigan' ei.

⁴ Ne na'nuj rá 'uñj se vaa ta'veé so' gaa tanáj 'uñj mán so', ne che'é dan me ndo'o rá 'uñj quene'en uún 'uñj mán so', gaa ne cunu cuj nimanj qui'yáa so', raj a.

⁵ Dan me se achíin n̄i'yáá 'unj che'é so' che'é se nuû rá 'unj se vaa ne tiha' yu'unj so' mei. Ya nocó' so' man Diose, ne dan me se tucuáán nicaj níi so' chana cu'naj Eunice ga Xcuá'áán so' chana cu'naj Loida ro', nicaj ma'án so' uún, raj a.

⁶ Che'é dan cataj xna'anj 'unj rihaan so' se vaa yuun che'e ca'nej so' nimán so' qui'yaj suun so', ndaa vaa rqué Diose se nucuaj mán so' qui'yaj suun so', ga cutaj ra'aj raá so' á.

⁷ 'Q se nuveé sij chu'vi' nimán me ní', qui'yaj Diose ma'. Tananj nari' nucuaj nimán ní', ne nuu 'ee rá ní' tuvi' ní', ne tumé ní' man ní' me daj 'yaj ní', qui'yaj Diose adonj.

⁸ Che'é dan se guun na'aj so' nata' so' rihaan yuvij che'é síi 'nij ra'a man ní' mei. Ne se guun na'aj so' che'é se 'nij 'unj taga' ma'. Se chuchu'ví' so' quirán' so' sayuun ma'. Racuúj so' manj ca'mij natáj ní' se-nana Diose nana sa', ne Diose me síi qui'yaj guun nucuaj ní' adonj.

⁹ Ne Diose me síi tinanii man ní' rihaan sayuun, ne canacúún so' man ní' canoco' ní' man so' ei. Nuveé che'e suun qui'yaj suun ma'an ní' me qui'yaj Diose danj ma'. Maan se danj guun rá ma'an so' qui'yaj so', ne guun rá so' qui'yaj uun so' se luj che'é ní' ei. Asij ataa qui'yaj so' chumij, ne qui'yaj so' se luj che'é ní' che'é se sij noco' man Jesucristó me ní' a.

¹⁰ Ne yaj me se tihaan Diose rihaan ní' nu' se sa' nuu nimán so', se vaa ca'na' Jesucristó síi tinanii man ní' rihaan sayuun, qui'yaj Diose a. Yaj me se se ca'vee caví' ní', qui'yaj Jesucristó yaj a mei. Tzaj ne yo'o ga i'na' nimán ní' ga Diose nu' cavii nu' ca'anj, qui'yaj so', ne danj taj se-nana Jesucristó

nana sa' adonj.

11 Ne 'unj nihánj me síi cune' Diose se vaa guún 'unj apóstol nata' nana yo' rihaan yuvii, ne tucu'yonj nana yo' man yuvii adonj.

12 Maan che'é dan rán' 'unj sayuun nihánj cuano, tzaj ne ne na'aj 'unj a doj se vaa rán' 'unj mei. 'O se ne'én 'unj se vaa Diose me síi cuchumán raj ni'yaj 'unj man, ne guun ya raj se vaa uun nucuaj so' tumé so' manj qui'yaj sunj nu' suun ca'ne' so' rihanj, ne danj inanj qui'yaj so', racuíj so' manj ndaa güii ca'na' uún Jesucristó adonj.

13 Dan me se aj cunó so' nij nana ya ca'mii 'unj rihaan so' á. Ne ase cunó so' ro', danj qui'yáa so', ne yo'o gaa nucuaj rá so' man Diose, ne gaa 'ee rá so' man tuvi' so' che'é se sij noco' man Jesucristó mé so' á.

14 Ne Nimán Diose nuu nimán so' ro', racuíj mán so' se vaa yo'o qui'yaj suun so' suun sa' suun ca'ne' Diose rihaan so' qui'yáa so' á. Ne ve'é nıcaj so' tucuaán sa' narı' so' á.

15 Aj ne'én so' se vaa cunudanj nij síi cuchumán rá ni'yaj man Jesucristó yanj estadó Asia ro', tanáj nij so' manj, ne canoco' nij so' yo'ó tucuaán a. Vij tuvi' nij so' me síi cu'naj Figelo do', síi cu'naj Hermógenes do' a.

16 Me rá 'unj gaa 'ee rá Diose man nij tucua síi cu'naj Onesíforo a. 'O se aj guun que'ee ndo'o racuíj so' manj, ne ndaa nuu cuij nimán 'unj qui'yaj so', ne ne guun na'aj so' se vaa 'nij 'unj taga' ma'.

17 Tzaj ne gaa ca'na' so' chuman' Romá, ne cuaj nano' so' manj, ne nari' so' manj ei.

¹⁸ Me ndo'o raj gaa 'ee rá síí 'nij ra'a man ní' man so' se vaa se quiran' so' sayuun gaa güüi ca'na' uún síí 'nij ra'a man ní' rihaan chumiï nihánj a. Ne so' me síí ne'en doj rihanj se vaa qui'yaj suun ndo'o síí cu'naj Onesíforo che'é ní' sij noco' man Jesucristó gaa cane so' chuman' Efeso a.

2

Nana nihánj taj xna'anj se vaa se cunánj ní' rihaan sayuun a

¹ Ase vaa 'o ta'níj, danj vaa so' rihanj, tinuj. Ne me rá 'unj ca'vej rá so' nari' nucuj nimán so', qui'yaj Jesucristó síí 'yaj ndo'o se luj che'é ní' a.

² Dan me se man ndo'o síí cuno nana cataj xna'anj 'unj rihaan so', ne me rá 'unj tucu'yón so' nana yo' man doj nij snó'o luj nicaj tuvi' ga so' guun nij so' síí gaa nucuj nimán nata' rihaan yuviï guun nij so' uún a.

³ Se cuchu'ví' so' quirán' so' sayuun che'é se sij noco' man Jesucristó mé so' mei. Maan se ase vaa uno tanuu nana a'mii tanuu uun chij ro', danj gaa cuno ma'án so' se-nana Jesucristó á.

⁴ Dan me se vaa nij tanuu 'nij cuarteé, ne ne avii yaníj nij so' 'yaj suun nij so' ma'. Maan se ve'é 'yaj suun nij so' inanj suun a'ne' nii rihaan nij so', che'é se me rá nij so' guun niha' rá tanuu uun chij ni'yaj so' man nij so' a. Ne ase 'yaj guee tanuu, danj qui'yáá so', ve'é qui'yaj suun so' rihaan orún' Jesucristó á.

⁵ Dan me se veé danj 'yaj nij síí tico canaán uún, ne no xcúún nij so' cuno sa' nij so' nu' suun a'ne' nii rihaan nij so' qui'yaj nij so' adonj. Tzaj ne sese se

cuno sa' nij so' suun a'ne' nii rihaan nij so' qui'yaj
 nij so', ne daj chihaa míj se qui'yaj canaán nij so'
 cachriin yâj cunuû raâ nij so' ma'. Che'é dan sese
 me rá so' qui'yaj canaán so' ni'yaj Jesucristó, ne
 ve'é cunó so' rihaan so' ei.

⁶ Ne veé danj vaa síi 'yaj suun ndo'o naa uún,
 ne gaa rii nii naa, ne so' me síi quirí' tan' asino
 yaan gaa cuxra' ta'aj nii tan' uún adonj. Ne ase vaa
 ran' síi 'yaj suun naa ro', danj quirán' ma'án so', ne
 cavii sa' uxrá so' sese yo'o qui'yaj suun so' che'é
 Diose ei.

⁷ Cunó so' nana nihánj, ne racuíj Diose mán so'
 nari' so' cunudanj yo'ó nij nana chuguanj.

⁸ Se quini'yón so' man síi cu'naj Jesucristó a doj
 mei. Se quini'yón so' se vaa cunuu i'na' uún so' gaa
 cavi' so', ne se quini'yón so' se vaa noco' xna'anj
 tuví' so' ga síi cu'naj David síi cayáan gaa naá mei.
 Nihánj me nana sa' a'mii natáj 'unj á.

⁹ Che'é nana nihánj quirán' 'unj sayuun, ne ndaa
 'nij 'unj taga', ne nda' rá se vaa ran' síi tumé cacun'
 chuguanj. 'O se taj se 'yaj mei. Xa' se-nana Diose,
 tzaj ne se ca'vee numíj nii man yo' do', se ca'vee
 caxrii nii taga' man nana yo' do' mei.

¹⁰ Che'é dan ne chu'ví' 'unj quirán' 'unj me
 ma'an sayuun che'é nij síi narii Diose man ma'. 'O
 se danj gaa quirán' 'unj, gaa ne ca'vee cavii sa' nij
 so' ga 'unj che'é se vaa qui'yaj Jesucristó che'é ní',
 ne ve'é ndo'o gaa ní' ga Diose nu' cavii nu' ca'anj
 a.

¹¹ Ya vaa nana nihánj ei. “Ne sese aj cavi' ní' ga
 so', ne gaa i'na' ní' ga so' uún a.

¹² Sese se cunanj ní' rihaan sayuun, ne guun chij
 ní' ga so' uún a. Sese cataj ní' se vaa nuveé sij noco'

man so' me ní', ne cataj so' se vaa nuveé tuvi' so' me ní' uún a.

¹³ Nda' se ne sa' rá ní' ga so', tzaj ne so' me se sa' inanj so' ga ní' uún a. 'O se ne ne'en so' naqui'yaj ino so' nana ca'mii so' rihaan ní' a man adonj". Nana ya cunō ní' me nu' nana nihánj ei.

Nana nihánj taj xna'anj se vaa se cunō ní' nana a'mii rma'an yuvij ma'

¹⁴ Dan me se cataj xna'anj so' rihaan nij síí noco' man Diose se vaa se quini'yón nij so' nana nihánj mei. Ne nago' so' chrej nucuaj man nij so' se vaa se canó tuvi' nij so' che'é nana tucu'yón nij so' ma'. 'O se taj che'é qui'yaj nij so' danj man adonj. Maan se síí quene'en che'é yan unu' nij so' ro', quirí' rá nij so' adonj.

¹⁵ Ca'nej nucuaj nimán so', gaa ne ca'vee cataj Diose se vaa síí ve'é qui'yaj suun rihaan so' mé so', ne se cunó rej na'aj rihaan so' che'é suun 'yaj suun so' mei. Tanañj nata' nica so' se-nana Diose nana ya ei.

¹⁶ Se nanó xrej so' nana a'mii rma'an ta'aj yuvij ma'. A'mii a'mii uun nij so', tzaj ne che'é nana a'mii nij so' ro', me se doj a 'yaj nij so' se vaa na'vej rá Diose qui'yaj nij so' adonj.

¹⁷ Ase vaa ran' yuvij nó luj yuvaa ro', danj quiran' nij síí cunō nana a'mii nij so', ne nij doj quiran' nij yuvij uno nana avii tu'va nij so' adonj. Vij tuvi' nij so' me síí cu'naj Himeneo do', síí cu'naj Fileto do' chugañj.

¹⁸ Dan me se cataj roj so' se vaa aj quisij cunuu i'na' uún nij síí cavi', ne se cunuu i'na' uún doj yuvij, taj roj so' a. Danj tu'va roj so', tzaj ne ne

ne'en uxrá roj so' a doj a ma'. Tzaj ne vaa ta'aj yuvij cuchumán rá nana ca'mii roj so', ne che'é dan ca'ne' rá nij yuvij ga suun nucuaj rá man Diose, qui'yaj roj so',

¹⁹ tzaj ne aj cuchruj sca' Diose tucuáán noco' ní, ne aj naj se-sello so', qui'yaj so' a. Ne nihánj me nana no rihaan se-sello so' a: “Ne'en sí 'nij ra'a man ní' man nij sí noco' man so' a”. Ne yo'ó nana no rihaan se-sello so' taj: “Nu' nij sí nata' se vaa sij noco' man sí 'nij ra'a man ní' me nij so' ro', no xcúún nij so' tanáj nij so' nu' chrej chi'ii á”. Dan me roj nana noco' ní' adonj.

²⁰ Dan me se ve' tucúa 'o ru'vee me se mán xruj tu'vee ndo'o do', man xruj aga' oró míi do', man xruj aga' platá catzii do' a. Tananj uún, ne vaa xruj nij doj do' uún a. Vaa se rii nii man chruun do', vaa se rii nii man yo'óo niqiii do' a. Dan me se vaa se sa' doj, ne vaa uún se nij doj uún a.

²¹ Dan me se sese guun yanij so' ga nij yuvij tu'va rma'an yo', ne ase vaa xruj sa' doj ro', danj gaa ma'an so' rihaan nij so' a. Dan me se inanjan suun sa' doj qui'yaj suun so' che'é Diose, ne guun nucuáá so' qui'yaj suun so' nu' suun sa' che'é Diose á.

²² Tzaj ne se ca'vej rá so' quiyáá so' ndaa vaa me rá nij sí tachruu qui'yaj nij so' mei. Maan se guun rá so' quiyáá so' se sa' ni'yaj Diose á. Gaa nucuaj rá so' man so' á. Gaa 'ee rá so' tuví' so' á. Dínj cayáán so' ga yo'óo nij sí sa' nimán nij sí achíin ni'yaj rihaan sí 'nij ra'a man ní' á.

²³ Se ca'vej rá so' cano tuví' so' ga yuvij che'é nana mei. Ne acaj nij sí 'yaj danj cuentá ma'. Sij ataa nari' sa' me nij so' nanj adonj. Ne che'é se vaa

'yaj nij so', che'é dan unu' ndo'o nij so' ga tuvi' nij so' ei.

²⁴ Ne nó xcúún síí 'yaj suun che'é síí 'nij ra'a man ní' cunu' so' danj ma'. Maan se ve'é qui'yaj so' che'é cunudanj yuvij, ne ve'é tucu'yón so',

²⁵ ne tihaañ so' chrej sa' man nij síí me rá cunu' ga so' uún a. 'O se xcaj so' cuentá se vaa ca'vee raçuíj Diose man nij so', ne quinano rá nij so' che'é cacun' tumé nij so', ne quinari' nij so' nana ya a.

²⁶ Gaa ne ca'vee xcaj nij so' cuentá, gaa ne quinani' nij so' rihaan síí chree a. Ne síí chree me se so' me síí tiha' yu'unj man nij yuvij, ne quita'aa so' man nij so', ne cuano nihánj me se 'yaj so' ndaa vaa me rá ma'an so' qui'yaj so' man nij so' adonj.

3

Nana nihánj taj xna'anj daj qui'yaj nij síí chi'ii asa' nichrun' ca'na' uún Jesucristó a

¹ Ne'én so' se vaa asa' nichrun' ca'na' uún Jesucristó, ne guun ndo'o sayuun a.

² 'O se gaa 'ee uxrá rá nij yuvij man ma'an yuvij, ne guun ndo'o rá nij yuvij qui'yaj canaán nij so' sa'anj, ne cataj uxrá nij so' se vaa sij sa' ndo'o me ma'an nij so', ne nij ndo'o ca'mii nij so' che'é Diose uún a. Se cuno nij so' ca'mii rej nij so' do', nii nij so' do', uún ma'. Ca'mii nij so', ne se nago' nij so' graciá che'é rasuun, ne se guun rá nij so' canoco' nij so' man Diose mei.

³ Se gaa 'ee rá nij so' man tuvi' nij so', ne o ra'yunj tuvi' nij so', ne nana ndo'o nij so' cuentó ne che'é tuvi' nij so', ne se guun na'aj nij so' ni'yaj nij so' man nij so' mei. Ne se guun nucuaj nij so' ca'ne'

rá nij so' ga suun chi'ii nicaj nij so' mei. Inanj quij gaa nij so' ei. Ne inanj quinachri' nij so' ni'yaj nij so' rasuun sa' ei.

⁴ Ne inanj sí tiha' yu'unj tuvi' guun uún nij so' ei. Ne inanj ca'nej nimán nij so' qui'yaj nij so' chrej chi'ii ei. Ne yo'o ndaa raan rma'an cuman se nucui' rá nimán nij so', ne inanj nano' nij so' rasuun me rá ma'an nij so' a. Se nano' nij so' a doj man Diose a ma'.

⁵ Ase vaa yuvií noco' Diose ro', danj gaa nij so', tzaj ne daj chihaa mij se ca'vej rá nij so' naqui'yaj sa' Diose nimán nij so' ma'. Naxuun yaníj so' mán so' rihaan nij sí vaa danj ei.

⁶ Atúj nij so' rá ve' tucúa chana ne nicaj cuentá, ne tiha' yu'unj nij so' man nij chana ata daj a cacun' quij avii ra ma'an no' a.

⁷ Niganj tucu'yón nij chana yo' nu' nana sa', tzaj ne daj chihaa mij ne guun nucuj nij no' xcaj nij no' cuentá che'é nana ya yo' a mei.

⁸ Ne xa' nij sí chi'ii yo', tzaj ne nda' rá se vaa quiran' 'o sí chruun cu'naj Janes ga sí chruun cu'naj Jambres gaa quitáa ri'yunj roj so' man sí cu'naj Moisés gaa naá ro', danj quiran' guee nij sí taj ri'yunj man inanj nana sa' ei. 'O se sí man inanj nana chi'ii ra me nij so' do', sí aj tanáj xcō man Diose do', me nij so' ei.

⁹ Tzaj ne se quisíj nij so' xna'anj nana chi'ii yo' ndaa gan' ndo'o qui'yaj nij so' mei. 'O se cunudanj nij yuvií man rihaan chumii xcaj cuentá se vaa sij nij snúú rma'an me nij so', ne se cuchumán rá nij yuvií a doj ca'mii nij so' mei. 'O se nda' rá se vaa quiran' roj sí cu'naj Janes ga sí cu'naj Jambres gaa ne cuchuman rá yuvií ca'mii roj so' ro', danj

quiran' nij sí chi'ii yo' ei.

Nana nihánj taj xna'anj se vaa nda' se quiran' ní sayuun, tzaj ne yo'o canoco' ní se-nana Diose a

¹⁰ Ne xa' ma'án so', tzaj ne xcaj ndo'o so' cuentá che'é nana tucu'yón 'unj man yuvii do', che'é tucuaán nocó' 'unj do', che'é se vaa guun raj qui'yáj rej rihaan ní' do' a. Ne'én so' se vaa nucuaj ndo'o raj man Diose do', se vaa nanaj rá 'unj caxrii yuvaa 'unj man yuvii do', se vaa 'ee raj man tinúj do', se vaa yo'o nucuaj rá 'unj rihaan sayuun do' ei.

¹¹ Ne aj ne'én so' daj vaa sayuun qui'yaj nii manj, ne aj ne'én so' nu' se vaa quirán' 'unj chuman' Antioquía do', chuman' Iconio do', chuman' Listra do', uún chuguanj. Tzaj ne sí 'nij ra'a man ní' me sí tinanii manj rihaan nu' sayuun quirán' 'unj ei.

¹² Dan me se cunudanj uún nij yuvii me rá canoco' man Diose yuvii amán rá ni'yaj man Jesucristó ro', quiran' sayuun uún che'é Jesucristó ei.

¹³ Tzaj ne xa' nij sí tiha' yu'unj, tzaj ne tananj a doj a doj a ca'anj nij so' tiha' yu'unj nij so' man nij yuvii do', tiha' yu'unj nij yuvii man nij ma'an nij so' do' ei.

¹⁴ Ne ma'án so', tzaj ne yo'o canoco' so' nana cuchumán rá so' nana narí' so' á. 'O se aj ne'én so' me ní' me roj chana tucu'yón nana yo' mán so' ei.

¹⁵ Ne aj ne'én so' se vaa asij ne'ej mé so', ne quene'én so' daj taj nij yanj guee, ne yanj yo' me se qui'yaj ca'vee xcaj ní' cuentá, ne che'é dan cuchumán rá so' ni'yaj so' man Jesucristó, ne cavii sa' so' nu' cavii nu' ca'anj yaj adonj.

¹⁶ 'O se ma'an Diose qui'yaj cachrón nii nu' nana man rihaan yanj yo' adonj. Ne che'é dan vaa se

guun ndo'o man nana yo' rihaan ní' adonj. 'O se vaa ndo'o rasuun nari' ní' uno ní' nana man rihaan yanj yo', ne taj xna'anj yo' rihaan ní' che'é cacun' tumé ní', ne axrij yuvaá yo' man ní' che'é cacun' 'yaj ní', ne tucu'yón yo' man ní' daj qui'yaj ní' ve'é qui'yaj ní' canoco' ní' man Diose, ne taj xna'anj yo' rihaan ní' daj gaa sa' nimán ní' uún a.

¹⁷ 'O se ní' sij noco' man Diose me se danj gaa ya, gaa ne yo'o ca'vee cunuú nana sa' nimán ní', ne yo'o qui'yaj ní' daj a rasuun sa' ei.

4

Nana nihánj taj xna'anj se vaa se ca'ne' rá ní' ga suun a'mii natáj se-nana Diose rihaan yuvij ma'

¹ Cuanó nihánj me se me rá 'unj cunó Diose cunó Jesucristó síi ca'na' uún guun chij rihaan chumij nihánj síi ca'ne' cacun' che'é síi vaa i'na' do', che'é síi cavi' do', se vaa ca'ne' yá 'unj suun rihaan so'

² ca'anj so' nata' so' nana sa' á. Taj se 'yaj sese vaa ya'núj rihaan so' do', se ne vaa ya'núj rihaan so' do', taj se 'yaj ma'. Maan se ca'mij natáj yá so' ei. Cataj xna'anj so' rihaan yuvij che'é cacun' tumé nij yuvij, ne cataj so' se vaa nij ndo'o 'yaj nij so', ne nago' so' chrej nucuaj man nij so' qui'yaj nij so' inanj se sa' ei. Tzaj ne se gaa ra'yanj rá so' caxrij yuvaá so' man nij yuvij mei. Tananj yo'o gaa inaj nimán so', ne ve'é tucu'yón so' man nij so' ei.

³ 'O se vaa güii, ne se ca'vej rá nij yuvij cunó nij yuvij nana 'yaj ca'vee cunuú sa' nimán nij so' man chuguanj. Maan se guun rá nij so' cunó nij so' yo'ó nana naca, ne che'é dan nano' nij so' que'ee síi tucu'yón yo'ó nana me rá ma'an nij so' man nij so' a.

⁴ Ne ca'anj nij so' rej nuvi' nana ya cunō nij so', ne nanj cuentó ne cunō nij so' a.

⁵ Tzaj ne so' me se ca'nej sa' inanj so' tucuáán sa', ne gaa inaj nimán so' gaa rán' so' sayuun, ne yo'o nata' so' se-nana Diose rihaan nij sí ataa xcaj cuentá á. Dan me se qui'yaj suun so' nu' suun ca'ne' Diose rihaan so' á.

⁶ Xa' 'unj, tzaj ne nichrun' cavi' 'unj che'é Diose, ne quinaj chumiñ nihánj nanj ei.

⁷ 'Uñj me se quisíj qui'yaj suun uxrá yaj suun ca'ne' Diose rihanj, ne yo'o canocó' 'unj se-tucuanj Jesucristó,

⁸ ne cuanō nihánj me se maan se na'vij uún 'unj quisíj güii ca'na' uún sí 'nij ra'a man ní' rihaan chumiñ nihánj, ne rque so' 'o cachriin yâj cunuû raá 'unj, ne cataj so' se vaa nuvi' cacun' taj xraj a. Dan me se cuesē nica nimán ya me Jesucristó, ne nuveé che'e orún' 'unj me qui'yaj so' danj ma'. Ne veé danj qui'yaj so' che'é cunudanj nij yuviñ me ndo'o rá ca'na' uún so' rihaan chumiñ nihánj nanj adonj.

Nana nihánj taj xna'anj se vaa cuchi' Timoteo rihaan Pabló a

⁹ Ra'yanj ca'na' so' rej nuu 'unj nihánj ca'na' so' ni'yaj so' manj ei.

¹⁰ 'O se tanáj sí cu'naj Demas manj, che'é se caran' doj rá so' ni'yaj so' rasuun man rihaan chumiñ nihánj, ne ca'anj so' chuman' Tesalónica nanj ei. Sí cu'naj Crescente ca'anj estadó Galacia, ne sí cu'naj Titó ca'anj estadó Dalmacia ei.

¹¹ Daj orún' sí cu'naj Lucas nicun' ga 'unj nihánj cuanō nanj ei. Ničaj so' man sí cu'naj Marcos

ca'na' so' ei. 'O se vaa ndo'o suun qui'yaj suun 'unj, ne racuj so' manj, raj a.

¹² Ne sí cu'naj Tíquico me se ca'néj 'unj man so' ca'anj so' chuman' Efeso ei.

¹³ Tanáj 'unj se-roto 'unj tucúa sí cu'naj Carpo sí ne chuman' Troas, ne nicaj so' man yo' ca'na' so' doj ei. Dan me se nicaj so' nij dáán 'unj do', nij yanj nuj xcuu do', ca'na' so', che'é se ra'yanj ndo'o achiin yo' manj nihánj ei.

Nana nihánj taj xna'anj se vaa qui'yaj ndo'o sí cu'naj Alejandro sayuun man Pabló a

¹⁴ Dan me se xa' sí cu'naj Alejandro sí 'yaj suun aga', tzaj ne qui'yaj ndo'o so' sayuun manj, ne narque sí 'nij ra'a man ní sayuun man so' che'é sayuun qui'yaj so' manj, raj a.

¹⁵ 'O se tadó so' ga so' se gaa nanj qui'yaj so' sayuun mán so' á. 'O se na'vej uxrá rá so' cuno yuvi se-nana ní a ma'.

Nana nihánj taj xna'anj se vaa racuj Jesucristó man Pabló gaa canicun' Pabló rihaan cuese a

¹⁶ Gaa ca'anj 'unj rihaan nij sí nicaj suun qui'yaj nii, ne nuvi' a 'ó tinúú ní racuj manj a ma'. Maan se tanáj cunudanj nij so' man orún' 'unj rihaan nij sí nicaj suun, tzaj ne na'vej raj caraa Diose cacun' xráa nij so' a mei.

¹⁷ 'O se canicun' sí 'nij ra'a man ní ga 'unj, ne so' me sí qui'yaj guun nucuáá 'unj natá' 'unj nu' se-nana Diose cuno cunudanj nij yuvi yanj, ne tinanii so' manj rihaan sayuun nocoo,

¹⁸ ne so' me sí tinanii manj rihaan daj a se nij me rá nii qui'yaj nii manj, ne so' me sí qui'yaj cavii sa' 'unj cayáán 'unj ga so' asa' nanij so' rej xta' ne guun

chij so' rihaan chumij nihánj a. Ve'é inanj ca'mij ní' che'é so' nu' cavii nu' ca'anj á. Veé danj gaa ya ei.

Nana nihánj taj xna'anj se vaa ve'é cumán nij tuvì' Timoteo, rá nij tuvì' Pabló a

¹⁹ Me rá 'unj se vaa ve'é cumán chana cu'naj Prisca do', nica no' síí cu'naj Aquila do', nij tucua síí cu'naj Onesíforo do' ei.

²⁰ Quínáj síí cu'naj Erasto chuman' Corinto, ne síí cu'naj Trófimo me se ran' so' a. Che'é dan tanáj 'unj man so' chuman' Mileto nanj ei.

²¹ Ra'yanj ca'na' so' nihánj yaj gaa ataa ca'na' yavii acoj ndo'o a. Ve'é cayáán so', rá síí cu'naj Eubulo do', síí cu'naj Pudente do', síí cu'naj Lino do', chana cu'naj Claudia do', taran' nij tinúú ní' do' ei.

²² Me rá 'unj cayáán síí 'nij ra'a man ní' ga nimán so', ne qui'yaj ndo'o Diose se luj che'é nij soj a.

**Se-nānā Diosē nanā sã' me rá catũũ nimán ní'
a
New Testament in Triqui, Copala (MX:trc:Triqui,
Copala)**

copyright © 1987 Wycliffe Bible Translators, Inc.

Language: Triqui, Copala

Translation by: Wycliffe Bible Translators, Inc.

Triqui, Copala [trc], Mexico

Copyright Information

© 1987, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Triqui, Copala

© 1987, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

3a8f2838-fe9f-5490-8d78-a7bbfddab871